

2 TIMOTIY

Wankuyeim Pawl igaw nises wədeil ven yagan Lom, mo ilel Timotiy nalet, sivyuein inek. Mtowen Pawl ikakin kakita beimat, tage isimounid bwein Yeisuw Kelis waseg. Iguy Timotiy, ilana, “Bweina kutawtoun silmənin Yeisuw nawotet.” Ilelel-vak, ilana, “Sivinag gunawlioug mwasanin, kukow, kum, kumyakeig.”

Nakabsilamaw

¹⁻² Kalin nuwag natug bwanabwein yakoum Timotiy.

Yey Pawl balel mulet beiw mo kuvin.

Peinan Yowbad nanon waseg ye yey mawan, livanen Yeisuw Kelis akokew, vagan kid gamag biliganes mo bibanes simwamov. Yowbad nakaleiwag mawan.

Tamads Yowbad son daGuyaws Yeisuw Kelis bisiwyoubum, binok nuwes yakoum, vagan mo beitaw nuwam.

Yeisuw livnen bwanabwein

³⁻⁴ Yey singaya akkulul guntovek Yowbad wamatian, singaya tut babaw akaninow aygan, mawan-vak timog, tibug. Aninuweim yak tut babaw mo aninitoug peinam, yam katanok katanok, o boug katanok katanok wasigeis.

Anuway misumkwey nukutaneig nukuvlamweig gog. Yey singaya sivinag bakineim vayuwein mo bamwəsaw avakaein.

⁵ Singaya aninuweim peinan nukusimounid bwein Yowbad waseg; mawan-vak tabum

kudəvin Lowis, wanmugwana isimounid, wankuyeim mo inam Iwnis isimounid, tatoununvak yakoum. Akakin-wan singaya kusimounids bwein.

6 Mapuna adibakeim awoum bukusigan Yowbad nasiwəyoub nises waseg yak, nisekeim kweiboug misumkwey ye yey namag nasen wəwoum. Kutoukum vəgan nasiwəyoub towenan wanuwam bitawtoun waseg yakoum.

7 Yowbad Kululuwan ivagein waseg yakids nag ivag adpwayats, tage tawtoun, siwəyoub o kaptatul isekeids.

8 Bweina bukulivan livənen daGuyaws. Awoum bukumsin. Awoum kumsineig ye, peinan wədeil nases. Yakoum-vak bukugeiguy livənen Kelis mo bigeg abam, tage Yowbad bikimtuweim bukutawtoun mo bukutam waseg.

9 Yowbad gog nikayuseids silmənin nawotet, nag peinan adsinaps bwanabwein, nag; tage peinan nikatigikeids, mo isiwyoubuds Yeisuw Kelis waseg, tut kweibouga tonen.

10 Nasiwəyoub bo nikaluweg kweiboug, nagein gog mo ikamat, peinan Takatinabweids bo isap, mtown Yeisuw Kelis, iyakous kanig, mo ikitilow isen mwamovads nag beikous. Livənen Yeisuw inawotet bo məwan.

11 Yowbad bo ikaliwageig, livənen bwanabwein isekeig vəgan banoy ven babaw wasigeis, baka-timlakay.

12 Mapuna gamag iyagageigs, waseg abag ige; tage nag ivag agumwasin, nag. Peinan

bo asimounid towen waseg, mapuna akakinwan, aveiyag gunawotet towen nisekeig, bo bimtakavet mtowen, bisesuna ee... tut wanakougwaw nakaleiwag mo bisap ven watinow waseg.

¹³ Yeisuw Kelis waseg kusimounid, kusiwayoub mo bukulivan mounid, mawan ye yey agulivan nukuligen. Kadiloka kuyous livan towen beibwein.

¹⁴ Peinan Yowbad kululuwan wanuwads nises, ansinap bo isekeim amsinap yakoum. Livan towen kumtakavet beibwein.

¹⁵ Adok kukwakin-wan tasiyas min-Esiy bo ipiyaveigs, sisiyas tasiyas Pigelus son Emogenes.

¹⁶⁻¹⁷ Sivinag Yowbad binok nuwan Onesipol sen inagamags, peinan tut babaw issiwyoubugswan, mo ibwein amnag. Nag imsineig ye yey nases wadeil; im ven towen Lom iligen bulagag, im ininineiv ee... mo ibaneig.

¹⁸ Igaw yam towen waseg daGuyaws nakaleiwag bisap, sivinag daGuyaws binok nuwan waseg taw towen. Kukwakin-wan inawotet babaw ven Epesos waseg.

2

Yeisuw Kelis natakanaviy bwanabwein

¹ Natug, bweina bivakaein Yeisuw Kelis nasiwayoub waseg yakoum, vagan bilabeim mo bukutawtoun yak.

² Livan towen, misumkwey wamtes tasiyas tayekelesiys nakatipel nasekeim, bweina bukwatimlakes tasiyas tatoukums, wankuyeim mo bikatimlakes gamag babaw.

3 Bweina simey yak bigeg abads, peinan Yeisuw Kelis natakanavyi bwanabwein yäkids. Awoum kupiyev; bweina kwaptuleim wotet towen waseg.

4 Awoum takanavyi bikiywawayu, nakayal wanakätay, nawlioug wanakimaw. Natovek bo ikäbut silmañin naviy, kadiloka bilavew ven wuliougwan.

5 Kutoukum, kuvnas Yeisuw nakaleiwag beibwein. Mäwana kawldeiy, kukin kal bitamap, igaw lalan mo biban; tage kukin nag bivnas kawldeiy kaleiwag-nen, bo nag.

6 Mäwan-vak tabgubag, kukin bitawtoun wan-mugwaw bo beikam kan.

7 Kuninuway agulivan kabebay towen. Yowbad bilabeim vägan mo bukukwakin youd babaw.

8 Kuninuway Deibid tabun, mtownen Yeisuw Kelis, neikit kanig waseg; yej gunakageiguy bo mäwan.

9 Ageiguy livan bwanabwein waseg, mapuna äbag singaya ige. Iyawanis namag vatul tanmunum waseg, mawana takalbaleb tatonen yej; tage ta-mäwan biyawanis Yowbad anilivan wanuwads nises, nag.

10 Mapuna akaptuleig-wan moumouvit waseg, vägan kid balabes Yowbad nagamag tasiyas bo nikatigikes; sivinag kid Yeisuw Kelis bikatinabwes silmañin sikamnat nag beikous.

11 Livan towen mounid-wan; kukin sods Kelis bitakanigs, sods-vak Kelis bitamwamovs.

12 Kukin bitakaptuleids; mo bitaguyaws sods Kelis. Kukin gog bitakayan, towen mo bikayäneids.

¹³ Kukinegog bitapiyaves, towen-vak bisesunawan, peinan ansinap bwanabwein bo ikunek. Tamañwan bipiyev.

Yeisuw natouwat bwanabwein

¹⁴ Livan towen, kuguyes gamags wasigeis, vagan binuways beibwein. Kudibakes wamatatan Yowbad, kulana, “Awoum kwamnimans livan kweitan kweitan wasigeis, awoum. Kamniman tasiyas nag bilabeimiy; nag. Tage mounida biyagageimiy, mounid.”

¹⁵ Kutoukum yak, sinap mounid kulivan bwein, vagan Yowbad bikineim, mo beitam waseg yakoum; wankuyeim nag beivag ammwasin, nag.

¹⁶⁻¹⁷ Tage awoum kwamnimans mav, kusinales tasiyas takammnimans peinan asilivan biyagages tatineis, mapuna bikatimweis asisinap kalbaleb, mañwan gamag bikasipom, kisikis gog biyamweis mo bivakaein ansipom. Mañwan tasiyas Aimenay son Piletus, asilivan kalbaleb.

¹⁸ Tasiyas asteiy bo ipiyaves livan mounid, peinan asilivan ilansa, “Gamag sikabeikit vayuwein bo ikous. Bo nein-o wankuyeim.” Ilivans mañwan, gamag mwasanin iliganes, mo ipiyaves sitapwäloul, peinan nag isimounids bwein.

¹⁹ Tage Yowbad nakawutun waseg silmanin tapwäloul mounid, anlelel mamagina: “DaGuyaws ikakin kalisiy inagamag.”

Kwayuwein lelel mamagina:

“Kukin kalisiy bidokes siGuyaw Yowbad, kadiloka bilavewas asisinap kalbaleb.”

²⁰ Bunsiyas bunatum bunuvkäveks wanuwan, abmavin mwasanin nisesus, wous goul-wan,

mwasanin gog silib, mwasanin amweilok, mwasanin gog bidapwats; mwasanin silmānin guyawaw, mwasanin gog sim vagan.

21 Kukin kal bipiyev sinap gagānen, gamag towen mamagina abmavin silmānin guyawaw; natovek gog mo bikayus taw towen, silmānin inawotet, ikadilokena wotet babaw bwanabweins.

22 Bweina kupiyev sinapun wulat, peinan tawlat yak; tage kunineiv amisinap bwanabwein, simounid, o siwayoub, sona miniwal, simwey tasiyas asisinap kamnat, mo initougs daGuyaws waseg.

23 Kadiloka kupiyaves kamniman mav, peinan tasiyas billivans mav, mo bikammeiliws, wankuyeim mo bikawpwanaws.

24-26 Peinan yakoum daGuyaws natouwat yakoum, awoum kwamnimans wasigeis, tage bweina kusiwyoubus gamags, kwatimlakes beibwein, o bukuyamanum wasigeis. Kukin mwasanin bisilbwadeims, bweina kuyamanum wasigeis, vagan bukwatimlakes mo bikakins tasiyas asisinap kalbaleb. Adok igaw Yowbad mo bilabes vagan bipiyaves asisinap kalbaleb, mo bikakins sinap mounid. Wankuyeim mobeitout Seitan anasik, bisawls. Peinan Seitan anasik bo ikwanes tasiyas silmānin inawotet tatonen biwteles.

3

1 Bweina kukwakins nakabiyokous tut waseg, mo tut kalbaleb bitalivatus, ven watinow waseg.

2-5 Peinan gamag mwasanin tatineisina bisiwyoubus, bipwākits silmānin ney, bikayapams

sinap, nag beitams kaleiwag waseg, biyyagays, bisiplaves ages timsiyas, o insiyas, nag bikalin nuwes, peinan tadaub, nag binok nuwes, bivtokays live, takatiginaneys tasiyas, kapasal nuwes, bipiyaves sinap kamnat. Bo bisilakods, asisinap tatineis nag bipwaloves, bigagasa tatineis, nag sivines Yowbad, sivines kid simwəsawa tatineis, tage askakin mamagina tatapwəlouls, tage Yowbad natawtoun ipiyaves. Bweina kusinəles gamag tasiyas.

6-7 Mwasanin tasiyas bisousiws wanuwan bunatum, silmanin vinay mansiyas asisinap igwey. Nalbalebs nañin, peinan vikeiyan wous ikaliwages; live babaw binganegs, tage nag bidumwal ninous.

8 Mawan kweiboug Danis son Damalis sivines kid bisilbwades Moses, tasiyas mawan sivines kid bisilbwades sinap mounid; peinan ninous kalbaleb, nag isimounids bwein.

9 Gamag tasiyas singaya nuwanaw bisabwans, peinan gamag babaw mo bikakins tasiyas asisinap mamagina baləwein. Mawan kweiboug Danis son Damalis sivines bisilbwades Moses, mo gamag babaw ikines asisinap baləwein.

Pawl ikaleiwag waseg Timotiy

10 Gunakatimlakay bo kukwakin, agusinap kukwakin-wan, gunaked kukwakin-wan, peinan asimounid, o akaptuleig, o asiwəyoub, atoukum.

11 Bo kukwakin tasiyas niyagateigs, mo abag ige. Antiyok waseg, o Ikoniym, o Lisi-ti. Wunsiyas ven wasigeis, singaya abag ige,

tage daGuyaws mo ikatinabweig mouvit babaw wasigeis.

12 Magat kalisiy gamag tasiyas sivines asisinap beivag kamnat Yeisuw Kelis waseg, mo bigeg abes, peinan gamag mwasanin biyagages.

13 Tage tasiyas takalbalebs sisiyas tasiyas taka-tidividavs bikatimweis asisinap kalbaleb mwano bivakaein singay, bikatidavis gamags, peinan Seitan bo ikatidavis tasiyas.

14-15 Yakoum gog amsinap awoum bukuvag mawan tasiyas, tage sinap to nakakatimlakeim kweiboug nukusimounid, kadiloka kutoukum sinap towen waseg. Kukwakin-wan yakamey kweiboug nakakatimlakeim mawan, o yakoum igaw-o wagwadim nukukwakin gog Yowbad inabuk. Kukin livean towen bukuligen, mo bukusimounid waseg Yeisuw Kelis, vagan Yowbad bikatinabweim.

16-17 Bukitab meivek-wan Yowbad anilivan; ikadiloka bitavin mo bikatimlakeids adsinaps kalbaleb waseg yakids, bikidumwaluds mo bitakakins, vagan bitatawtouns sinap didumwal waseg, mo bitayakousis sinap kamnat, o bikadilokeids-wan woteta babaw bwanabwein; mamagina Yowbad angamag yakids.

4

1-2 Wamtes Yowbad son Yeisuw Kelis kuligen agulivan towen beibwein, peinan Kelis takaleiwag, igaw mo bikatukin wasigeis tasiyas tamwamovs sisiyas tasiyas kweiboug nikankanigs, igaw tut wanakougwaw mo bisap, silmanin nakaleiwag. Agulivan mamagina:

Bweina bukugeiguy livānen Yowbad. Bweina biseiw nuwam silmānin geiguy tut babaw, takinew tut bwanabwein waseg, o takinew tut kalbaleb waseg. Bweina kugeiguy vāgan bisimounids, kuyadumwālus vāgan asisinap beibwein, bitawtoun. Bweina kwaptuleim tuta babaw geiguy waseg.

³ Igaw tut wanakougwaw gamag mwasanin mo bipiyaves katimlakay mounid, tage sivines kid ninous tatineis, mogo sivines sitakatimlakay bibabaw vāgan bigeiguy mo biliganes tasiyas, bilansa, “Tageiguy towen bwanabwein, sinap to nilivan singaya sivinag.”

⁴ Bo biliganes sitakatimlakay tasiyas, mo bipiyaves livan mounid, tage sivines kwāneib, o makava taleiliw binganegs.

⁵ Tage yakoum kutitoukum muwotet waseg. Kukin gog abam bigeg bweina kwaptuleim, bweina kukokew livānen Yeisuw, vāgan bukwatimlakes gamag babaw, mo bikadilok muwotet gamag wasigeis.

⁶ Yey gog kakita bo beiweigs, mamagina lun bulukwan yey. Kakita bo balisow ven watinow.

⁷ Singaya bo avatay waseg Seitan, gunawotet bo ikous, peinan tut babaw singaya asimounid waseg Yeisuw Kelis.

⁸ Igaw tut wanakougwaw daGuyaws mo bisekeig agupay, yagan sinap didumwal. DaGuyaws bo ikatineg peinag yey. Igaw mo bikaleiwag bwein wasigeis gamags, o yam towen adapays bisekeids sigwey kalisiy sivines nakabsunap ven watinow.

⁹ Kuyokon vāgan nuwanawa bukum.

10 Peinan Dimas bo ilisaweig, bo ipwäkit ven watinow wuliyougwan, ipiyaveig, mo inoun in Tesalonik. Kilisens-vak bo inoun in Galetiy. Titos-vak bo nein Dalimatiy.

11 Amateiyuna nakases, soug Luk. Kudibek Mak, kuto^k, amiteiy kumeis, peinan guntouwat bwanabwein towen Mak.

12 Tikikos bo akayeb nein Epesos.

13 Agukweim mwaynavakaein kukow kumey, bo alisow ven Tilowas waseg, Kalip-o wanbunatum waseg, kukwawem-vak gunabuk son sinbibil mwaynatan, singaya inok nuwag sinbilibil towen.

14 Tawtelein tanmunum mtowen yagan Aleksandel, singaya bo iyagageig mounid, igaw daGuyaws mo bimop ansinap kalbaleb.

15 Yäkom-vak kuvnäseim, peinan taw towen singaya tasilbwadein dakageiguy.

16 Tasiyas mina-Lom sivtanoka iyateleigs ikous, tagé nag kal ilivan vägan bilabeig, asibabaw-wan aspwäyat mo ilisaweigs. Awoum geg Yowbad bimop kid asisinap kalbaleb.

17 Tage Yowbad ilabeig, itoun wadadag ikimtuweig mo atawtoun, ageiguy livänen Yeisuw mo ayakous, vägan gimgilis ven dadub asibabaw-wan mo binages agulivan. Mapuna Yowbad ikatinabweig layon wadon waseg.

18 Tage Yowbad igaw mo bikatinabweig, kalbaleb babaw wasigeis, mo bäsiw wanuwan nakaleiwag walbalab. Mapuna bitakavasis Yowbad tut nag beikous. Eimen.

19 Agulivan siwayıoub kudibakes Pilisik son Ak-wil, sisiyas Onesipol sen inagamags wanbunatum nisesus.

20 Elasit bo alisow, nises ven Kolinit. Tilopim ikatoun bo alisow ven Miletus waseg.

21 Kuyokon tut towen nuwanaw bukum, igaw-yay niwal, peinan wuwal anatut, mamagin geg bulbweilim bisilbwadeim ta-mawan bukum. Ewbilis anlivan siwayoub waseg yak. Mawan-vak tasiyas Pudens, Linos, Kilodiy, sisiyas tasiyas tayekelesiys asibabaw-wan.

22 DaGuyaws bikintuw kululuwam, mo bukutawtoun. Yowbad bo bisiwyoubumi.

Yey Pawl.

KALEIWAG KWEIVAW
The New Testament in the Muyuw Language of Papua
New Guinea
Nupela Testamen long tokples Muyuw long Niugini

Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files
dated 9 Oct 2020

517ae3da-6769-54e8-8afcd-7d53f958558c